

現代生活藝術系列

華嚴經疏論纂要 42

——無盡藏品之一

華藏淨宗學會印贈

大方廣佛華嚴經疏論纂要卷第四十二

五臺山清涼國師澄觀疏鈔

太原方山長者李通玄論

閩鼓山私淑比丘道霈纂要

十無盡藏品第二十二之一

○四門中初來意

〔疏〕來意者。總有五義。一爲答前第二會初十藏問故。二前明正位。今依位起行故。同梵行品。三前約位別行。今辨始終通行故。四前明成位行。今辨淨治彼行故。同十地中信等十行。五前自分究竟。今

辨勝進趣後。同上明法。準問。應在十迴向後。今此
辨者。畧有二義。一云藏有二義。約蘊攝義。在十行
後。約出生義。在十地前。義通二處。問答互顯。一云
迴向無別自體。但以能迴前行爲其自體。今十藏
既爲十行勝進。亦爲迴向勝進。故迴向後。無別勝
進。此卽前後互舉。顯義方備。然明法品及第五迴
向。皆有十藏。隨三賢異。故不相濫。又前是勝進所
成。後是一位之果。今通爲勝進。故意旨不同。鈔準問下。

釋上問前却妨。二義通之。然明法下。會差別。有二
義釋。初以位揀。前明法卽勝進所成者。是勝進家
果故。故經云。菩薩滿足如是願時。卽得十種無盡
藏。所謂普見諸佛無盡藏。二總持不忘無盡藏。二

決了諸法。四大悲救護。五種種三昧。六滿衆生心。廣大福德。七演一切法甚深智慧。八報得神通。九任無量劫。十入無邊世界無盡藏。後是一位之果者。以是第五迴向之果故。經云菩薩住此迴向。得十種無盡藏。所謂見佛無盡藏。於一毛孔見阿僧祇諸佛出興於世故等。其中有同名者。亦復優劣異有。

○二釋名

〔疏〕釋名者。藏是出生蘊積之義。謂一藏內體合法界。故攝德出用。二無盡。寄圓顯十。卽帶數釋也。

○三宗趣

〔疏〕宗趣者。十藏爲宗。攝前生後得果爲趣。

〔論〕將釋此品二門如前。一釋品名目者。爲此說十

種藏。依法立名。可知。第二釋品來意者。此位已說十種行。以此十無盡藏。成前十行之法。使令無盡。成後十迴向之法。使令進向。令使行門不滯。是故此品須來。第三長科經意者。分爲二門。一長科經意。二隨文釋義。一長科經意者。於此一品經中。大段隨十藏名目。總有十一段經。其文如下。

○四釋文中。大分四別。第一唱數顯同。二徵名列異。三依名廣釋。四總歎勝能。今初。

爾時功德林菩薩。復告諸菩薩言。佛子。菩薩摩訶薩。有十種藏。過去未來現在諸佛。已說當說。今說。

疏三世同說顯勝令遵

○二徵名列異

何等爲十。所謂信藏。戒藏。慙藏。愧藏。聞藏。施藏。慧藏。念藏。持藏。辯藏。是爲十。

疏藏如前解。信等對藏皆持業釋。心淨名信。制止名戒。崇重賢善爲慙。輕拒暴惡爲愧。餐教廣博爲聞。輟已惠人爲施。決擇諸法名慧。令心明記爲念。任持所記爲持。巧宣所持爲辯。各有業用。鈔各有業用者。如信以能除不信濁爲業。戒以遮防破戒蔽爲業。慙以對治無慙止息惡行爲業。愧以對治無愧止息惡行爲業。聞以能破無知爲業。施以止慳爲業。慧以破痴爲業。念以治忘念爲業。持以治忘失爲業。

業。辨以治於塞訥爲業。然念慧及戒慚愧等五。皆當體爲性。餘五行用立名。此約隨相。若就融通。皆順法界之行。良以法界性自清淨。離過等故。隨義說十。然約隨相。前九自利。後一利他。通皆具二。信爲行本。故首明之。依信離過。慚愧莊嚴。戒行光潔。上三離過之行。餘皆進善。進善之首。必藉多聞。如聞而行。唯福與慧。念使增明。持令經久。辨以利他。故前七卽七聖財。慧爲正導。故終辨之。次二守護。後一積而能散。

○第三依名廣釋。十藏卽爲十段。今初信藏。信中

有四。謂徵名。釋相。結名。辨益。辨益一種。唯初七十。餘之七段。文但有二。今初段中。初徵

佛子。何等爲菩薩摩訶薩信藏。

○釋中分三。初明信相。次若菩薩下。明信力。三此菩薩入佛下。總結信成。今初

此菩薩信一切法空。信一切法無相。信一切法無願。信一切法無作。信一切法無分別。信一切法無所依。信一切法不可量。信一切法無有上。信一切法難超越。信一切法無生。

〔疏〕十句爲四。初三三空。信所執無相。謂情有理無

名空。空亦無相。空無相故。無所願求。次三。信依他。

無生。一緣起無作。二不實故。無能所分別。三無體。

故無所依。次三。信圓成無性。一廣無邊量。二勝故。

無上。三深不可越。鈔初三三空等者。意以前九別

性。信無三性。此初信所執。徧計所執性云無相者。即相無自性性。二依他無生。無生。即生無自性性。三圓成無性。無性。後一總信三性無生。如初會辨。即勝義無自性性。

則十皆無生。並通三性。如一無生觀。但信依他。無。

徧計人法自然之生性。則是無性圓成。餘例此知。

後一總信三性。總融前九。文中有三。一指前。即第一經。清淨功德眼自在天王。得知一切法不生不滅。不來不去。無功用行。解脫門。廣如前說。則十皆無生者。一空是無生義。二無相是無生義。三無願。

是無生義。四無作。是無生義等。竝通三性者。此有二義。一空等通。二謂徧計空。依他空。圓成空等。乃至三性難超越。二無相。無生。無性。亦通三性。下疏。依後義作一重云。如一無生。苦作無相。應云。但信依他。無徧計之相。是則圓成之相。若信依他。無自然之性。則悟圓成之性。是故結云。餘例此知。

○第二明信心中。二。先正顯業用。後徵釋所由。今初。

若菩薩能如是隨順一切法。生淨信已。聞諸佛法。不可思議。心不怯弱。聞一切佛。不可思議。心不怯弱。聞衆生界。不可思議。心不怯弱。聞法界。不可思議。心不怯弱。聞虛空界。不可思議。心不怯弱。聞涅槃界。不可思議。心不怯弱。聞過去世。不可思議。心不怯弱。聞未來。

來世不可思議。心不怯弱。聞現在世不可思議。心不怯弱。聞入一切劫不可思議。心不怯弱。

〔疏〕文有十句。徧從前十。前十竝成此十。若類例辨。初二於勝上法不怯。次四廣多法不怯。一所化衆生。二卽化法。三是化處。四化之所歸。後四寬遠法不怯。若尅文取義。以後十句逆配前十。謂由信法無生。故於佛法不怯。佛法以無生爲體。故佛難超。故衆生無盡。故法界無邊。故虛空無依。故涅槃無分別。故過去之因不作果。故未來之法無可願。故現在之法卽無相。故入劫無障礙。以卽空。故此十。

皆深廣難思。鈔若尅文取義者。上但當文通釋。今對前別釋經。

○二徵釋中。先徵意云。何以深廣難思。菩薩聞而不怯。釋意云。以於深廣皆堅信故。文分爲二。初總。後別。

何以故。此菩薩於諸佛所。一向堅信。知佛智慧無邊無盡。

〔疏〕總云。一向信者。無猶豫故。堅者。異說不壞故。所信謂何。卽佛智慧。智慧何相。無邊無盡。然通二義。一廣無邊。涯豎不可盡。二無二邊之偏。同眞性之無盡。

○二別釋

十方無量諸世界中。一一各有無量諸佛。於阿耨多羅三藐三菩提。已得。今得。當得。已出世。今出世。當出世。已入涅槃。今入涅槃。當入涅槃。彼諸佛智慧。不增不減。不生不滅。不進不退。不近不遠。無知無捨。

疏初釋前意。十方無量。是無邊義。已現當入。是無盡義。言得菩提。是自證義。出世入滅。是應現義。法無邊。故佛智無邊。一佛之智。尚不可盡。况橫徧十方。豎該三際。菩薩於斯廣遠。堅信不移。寧有怯耶。二彼諸下。釋第二意。聞深不怯。謂已得。今得。菩提。

而不增。當得未得而不減。已出今出而不生。已入今入而不滅。當出而不進。當入而不退。現得出入而不近。在於已當而不遠。照窮萬法而無知頓寂。諸相而不捨。以寂照之體如如。超戲論故。但以世俗文字數故。說有三世。非菩提涅槃有去來今。菩薩既堅信於此。寧聞深而怯耶。

○第三總結信成

此菩薩入佛智慧。成就無邊無盡信。得此信已。心不退轉。心不雜亂。不可破壞。無所染著。常有根本。隨順聖人。住如來家。護持一切諸佛種性。增長一切菩薩。

信解隨順一切如來善根。出生一切諸佛方便。

〔疏〕於中二。初一句總牒信成。謂由明達佛智無邊無盡故。稱此成信。二得此信下。顯成信之益。亦是正顯成相。有十一句。前七行體堅牢。初句爲總。二內心不雜故。不退。三外緣不沮故。四不染相故。五有正慧故。無慧之信。長無明故。靜法云。梵云阿慕羅匿陀。此云不從根生。謂無生之信。無根生故。今本云常有根本者。譯人不審。阿字沒在句。翻無爲有。於理背也。此或應爾。今以理通。二義無違。無根語慧之體。根本約慧之用。亦猶從無任本。立一切

法故無本者。卽是根本。六順同古聖故。七安住菩提心故。後四攝德無盡。一護已成性。二復長新解。三順如生善。四不滯有無。

○二結四益。

是名菩薩摩訶薩信藏。菩薩住此信藏。則能聞持一切佛法。爲衆生說。皆令開悟。

疏是名下結菩薩住此下。辨益易知。

○第二戒藏釋相中。二初列十名。後隨牒釋。今初佛子。何等爲菩薩摩訶薩戒藏。此菩薩成就普饒益戒。不受戒。不住戒。無悔恨。戒無違諍。戒不損惱。戒無

雜穢戒。無貪求戒。無過失戒。無毀犯戒。

〔疏〕初中十戒皆通三聚。取其相顯。初但饒益有情。後一律儀中八通三約。遮過罪。皆菩薩律儀。但爲救護等。卽是饒益。攝善可知。爲顯此十。皆通三聚。故釋後一。復顯三聚。

○二牒釋

云何爲普饒益戒。此菩薩受持淨戒。本爲利益一切衆生。

〔疏〕牒釋中。十戒爲十。皆先牒後釋。初饒益者。菩薩本意。故首明之。

云何爲不受戒。此菩薩不受行外道諸所有戒。但性自精進奉持三世諸佛如來平等淨戒。

疏二不受中文有二意。一不受邪戒。謂鷄狗等。二

三聚宿成動不踰矩。鈔謂鷄狗等者。涅槃二十四爲生天不爲恐怖。乃至不受狗戒。鷄戒。牛戒。雉戒。乃至是名菩薩修大涅槃。是第三戒。又十住毘婆沙論第三明穢土中多諸外道。有持牛戒者。鹿戒者。狗戒者。鳥戒者。象戒者。釋曰。此皆外道所持惡禁戒。通由二因。生此妄計。一由天眼。見有衆生從鷄狗等。卽生天上。故二由非理尋思。妄生此計。婆沙一百一十四。有二外道。一名布刺拏。僑維迦。受持牛戒。二名頽刺刺羅。栖你迦。受持狗戒。二人異時往佛所。種種慶語相慰問已。時布刺拏。先爲他問。此栖你迦。受持狗戒。修道已滿。當生何處。世尊告曰。汝止莫問。復再三請。佛以慈心。告言諦聽。受持狗戒。若無缺犯。當生狗中。若有缺犯。當墮地獄。

聞佛語已。悲泣哽咽。不能自勝。世尊告曰。吾先告
言。止不須問。今果懷恨。時布刺拏白言。世尊不以
此人當生狗趣。故我悲泣。然我長夜受持牛戒。或
恐將來。亦當爾耶。唯願大慈。為我宣說。世尊告曰。
准前狗戒。此等皆由不了真道。婆沙又問云。云何
受猪戒。牛戒。狗戒。名無缺犯。答。一如牛法。狗法。名
無缺犯。

云何為不住戒。此菩薩受持戒時。心不住欲界。不住
色界。不住無色界。何以故。不求生彼而持戒故。

〔疏〕三中。唯為菩提及衆生故。非如難陀之類。鈔非
如難陀之緣甚長。而人多聞。正明其性多欲。染著
孫陀羅佛方便誘之。至於天上。見諸天女。端正姝
麗。過其本妻。見諸天男。皆有天女。獨於一處。見有
天女。迥異姝麗。而無天男。問佛。佛令自問。彼女答
言。我夫主。即佛弟難陀。難陀答言。我身即是女言。
難陀為僧。身披袈裟。聞已。便求剃落。持戒。本為貪

著天女而持禁戒。故阿難譏之。如羝羊相觸。將前而更却。汝爲欲持戒。其事亦如是。身雖能持戒。心爲欲所牽。斯業不清淨。何用是戒爲。意云。如羊本擬向前。如汝欲生天上。受欲而更却。後如汝持戒。故業不
清淨。

云何爲無悔恨戒。此菩薩恒得安住無悔恨心。何以故。不作重罪。不行諂詐。不破淨戒故。

〔疏〕四中。涅槃云。何故持戒。爲不悔故。何故不悔。爲歡喜故。乃至爲得大涅槃故。鈔涅槃等者。卽第二緣故。受持禁戒。佛言。爲心不悔。何故不悔。爲受樂故。何故受樂。爲遠離故。何故遠離。爲安隱故。何故安隱。爲禪定故。何故禪定。爲實知見。何爲實知見。爲見生灰。過患故。何爲見生灰。過患。爲心不貪著故。何爲心不貪著。爲得解脫故。何爲得解脫。爲得無上大涅槃故。何爲得無上大涅槃。爲得常

樂我淨故。何為得常樂我淨為得不生不滅故。何為得不生不滅。為見佛性故。是故菩薩。性自能持。究竟淨戒。疏家但至涅槃已為究竟。故畧後三後三即涅槃中事故。

云何為無違諍戒。此菩薩不非先制。不更造立。常隨順向涅槃戒。具足受持。無所毀犯。不以持戒惱他。衆生令其生苦。但願一切心常歡喜而持於戒。

疏五中有四。非者違也。一不違制立不同調達。二不違涅槃。不取相故。三不違律儀。具足持故。四不

違利物。不惱他故。鈔不同調達者。佛說四依。為除比丘四惡欲故。調達比丘。加一為五。謂加不食酥鹽魚肉。復皆盡形壽。況雖有同本意不善。不違涅槃者。涅槃經以無相持。故

云何爲不惱害戒。此菩薩不因於戒學諸呪術造作
方藥惱害衆生。但爲救護一切衆生而持於戒。

〔疏〕六有二意。一非爲欲惱衆生。先須持戒。二非爲

欲成淨戒。逼惱衆生。如殺馬祀等。

鈔一非爲欲惱衆生者。如欲禁

龍。曾聞羅漢持戒而能遣龍。遂卽持戒是也。如馬祀等者。卽百論中。外道計殺馬祀天。得生梵天。卽逼惱於馬。謂爲戒等。

云何爲不雜戒。此菩薩不著邊見。不持雜戒。但觀緣起持出離戒。

〔疏〕七中。戒正見邪。故名爲雜。定有定無。爲斷常雜。觀緣性離。非有非無。則名爲持。又無煩惱之雜。真

出離矣。鈔定有定無者。今律學者多計爲有。禪學之者說戒如空。定有著常。定無著斷。此爲

邪見。雜於正戒。觀緣性離者。觀緣之相不壞堅持。緣成性空。故不起迷倒。

云何爲無貪求戒。此菩薩不現異相彰已有德。但爲滿足出離法故而持於戒。

〔疏〕八中不現異相彰已有德。五邪之一。已見淨行。

又如十住論說。一者矯異。二者自親。三者激動。四

者抑揚。五者因利求利。大同前引智度論說。今文

卽矯異也。鈔又如十住婆沙論說。一矯異者。謂有貪利養故。行十二頭陀。作如是念。他作

是行當得敬養。我作是行亦或得之。爲利養故。改易威儀。二自親者。爲有貪利養故。至檀越家而語

之言。汝等如我父母兄弟姊妹親戚。無有異也。若有所須。我能相與。若有所作。我能作之。不計遠近。

來相問訊。我住此者。正相爲耳。爲求利養。貪著檀越。能以巧辨。牽引人心。三激動者。謂有不計貪罪。欲得財物。現於貪相。語檀越言。此衣鉢尼師壇好。若我得之。則能受用。若人能隨意施者。此人難得。又有謂檀越言。汝家羹飯餅肉香美。衣服又好。若常供養我。我以親眷。必當相與。四抑揚者。謂貪利養。故語檀越言。汝極慳惜。尚不能與父母兄弟姊妹。妻子親戚。更有誰能得汝物者。檀越愧恥。俛仰施與。又至餘家。語彼人言。汝有福德。受人身不空。阿羅漢等。常入汝家。與汝坐起。語言。欲令檀越必謂我是大阿羅漢。五因利求利者。謂以衣鉢及僧伽梨尼師壇等資生之物。持示人言。此是國王及施主并餘貴人將來與我。令其檀越心中生念。王及貴人。尚供養彼。況我不與。因以此利。更求餘利。故以名也。

云何爲無過失戒。此菩薩不自貢高言我持戒。見破戒人。亦不輕毀。令他愧恥。但一其心而持於戒。

〔疏〕九中不輕毀者。無行經云。見破戒人。不說其過惡。應念彼人。久久亦當得道。問。涅槃云。見破戒人。應當擯黜呵責舉處。當知是人。得福無量。豈不違於無行此經。答。畧有三義。一。此經約自行。涅槃據攝衆。二。此經約根未熟。護恐增惡。故且攝受。涅槃約根熟者。慈心拔濟。故應折伏。三。彼約慈心。此約輕毀。故不同也。

云何爲無毀犯戒。此菩薩永斷殺盜邪淫妄語兩舌惡口及無義語貪瞋邪見具足受持十種善業菩薩持此無犯戒時。作是念言。一切衆生毀犯淨戒。皆由

顛倒。唯佛世尊。能知衆生以何因緣而生顛倒。毀犯淨戒。我當成就無上菩提。廣爲衆生說真實法。今離顛倒。是名菩薩摩訶薩第二戒藏。

〔疏〕十中。釋內分二。初明律儀。十善衆戒之本。故偏明之。廣如二地。二菩薩持此下。雙明二聚。攝菩提善。益衆生故。

○第三慚藏。釋相中二。先標章。二謂彼下別釋。今初。

佛子。何等爲菩薩摩訶薩慚藏。此菩薩憶念過去所作諸惡而生於慚。

〔疏〕然慚愧相別。諸說不同。涅槃云。慚者羞天。愧者羞人。慚者自不作惡。愧者不教他作。慚者內自羞恥。愧者發露向人。瑜伽四十四亦云。內生羞恥爲慚。外生羞恥爲愧。大同涅槃後解。成唯識云。依自法力。崇重賢善爲慚。依世間力。輕拒暴惡爲愧。俱舍亦同。若無慚愧。但翻上慚愧。謂不羞天。則是無慚。餘可例知。若說羞恥爲慚愧者。是一通相。今經多同唯識。而以不相恭敬爲二通相。

○二別釋中。分二。先釋過去作惡。卽無慚行。二自惟下。釋而生於慚。今初。

謂彼菩薩心自念言。我無始世來。與諸衆生。皆悉互作父母兄弟姊妹男女。具貪瞋癡憍慢諂誑。及餘一切諸煩惱故。更相惱害。遮相陵奪。姦姪傷殺。無惡不造。一切衆生悉亦如是。以諸煩惱備造衆惡。是故各各不相恭敬。不相尊重。不相承順。不相謙下。不相啓導。不相護惜。更相殺害。互爲怨讎。

〔疏〕文中初自念無慚。後一切下。悲他亦爾。

○第二正顯慚相

自惟我身。及諸衆生。去來現在。行無慚法。三世諸佛無不知見。今若不斷此無慚行。三世諸佛亦當見我。

我當云何猶行不止。甚爲不可。是故我應專心斷除。
證阿耨多羅三藐三菩提。廣爲衆生說真實法。是名
菩薩摩訶薩第三慙藏。

〔疏〕顯慙相中。初自念昔非。恥佛知見。現修慙相。自

惟卽是內自羞恥。

鈔自惟卽是內自羞恥者。正二
同涅槃。兼得唯識依自法力。

是故已下。決志斷證。文言去來現在行無慙者。言

總意別。菩薩自惟昔過。愍物三世常行。故專心斷

除。防已伏之再起。爲衆生說。則物我之兼亡。

○第四愧藏。釋相中三。初自念無愧而修愧行。

佛子。何等爲菩薩摩訶薩愧藏。此菩薩自愧昔來於

五欲中。種種貪求。無有厭足。因此增長貪恚癡等一切煩惱。我今不應復行是事。

疏云我今不應復行是事。卽愧行也。

○二傷物無愧

又作是念。衆生無智。起諸煩惱。具行惡法。不相恭敬。不相尊重。乃至展轉互爲怨讎。如是等惡。無不備造。造已歡喜。追求稱歎。盲無慧眼。無所知見。

疏不覺苦集。故云無知無見。

○三依顧世間而修愧行

於母人腹中。入胎受生成垢穢身。畢竟至於髮白面

皴。有智慧者觀此。但是從媯慾生不淨之法。三世諸佛皆悉知見。若我於今猶行是事。則爲欺誑三世諸佛。是故我當修行於愧。速成阿耨多羅三藐三菩提。廣爲衆生說真實法。是名菩薩摩訶薩第四愧藏。

〔疏〕依顧世間而修愧。行誓益自他。於中初所愧境。有智慧下。顧他生愧。卽外羞也。初因人。後諸佛。是故已下。決志斷證。言不淨之法者。從媯慾生。卽種子不淨。母人腹中。卽住處不淨。成垢穢身。卽自相。自性。究竟。髮白。意含。究竟不淨。鈔從媯慾生者。疏中先說五種不淨。一。種子不淨。二。住處不淨。三。自性不淨。四。自相不淨。五。究竟不淨。卽智論二十一說。梵行品已廣其

相。但自性不淨。卽三十六物。今當更說。卽涅槃十
 二。聖行。品云。從頭至足。其中唯有髮。一。毛。二。爪。三。
 齒。四。不淨。五。垢穢。六。皮。七。肉。八。筋。九。骨。十。脾。十一。
 腎。十二。心。十三。肺。十四。肝。十五。膽。十六。腸。十七。胃。
 十八。生藏。十九。熟藏。二十。大便。二十一。小便。二十
 二。涕。二十三。唾。二十四。目淚。二十五。脂。二十六。膏。
 二十七。腦。二十八。膜。二十九。骨。三十。髓。三十一。膿。
 三十二。血。三十三。膀。三十四。胱。三十五。諸脉。三十
 六。釋曰。遠公不分。其中骨有二。腦有二。腦連膜。除
 二次。欠。二。腸。有大小。亦欠其一。餘處有胞。則具三十
 六。直就經文。今具者。復有分垢爲一。言誑三世佛
 者。違本四弘誓斷惑故。餘文易知。

○第五聞藏

佛子。何等爲菩薩摩訶薩聞藏。

○釋相中二。初明所知之法。後菩薩摩訶薩下。顯

多聞之意。今初標稱聞藏。釋云知者。聞爲本故。實則多知耳。文亦分二。先標章。後牒釋。今初

此菩薩知是事有故。是事有。是事無故。是事無。是事起故。是事起。是事滅故。是事滅。是世間法。是出世間法。是有爲法。是無爲法。是有記法。是無記法。

疏句雖有十。義束爲七。初之四句。但是緣生故。謂一緣生。二有漏五蘊。三無漏五蘊。四有爲。五無爲。六有記。七無記。

○二牒釋。卽爲七段。初緣起

何等爲是事有故。是事有。謂無明有故。行有。何等爲

是事無故。是事無。謂識無故名色無。何等爲是事起。故是事起。謂愛起。故苦起。何等爲是事滅。故是事滅。謂有滅。故生滅。

〔疏〕緣起中。依生引二門。開爲四重徵釋。謂十二支。初二能引。次五所引。次三能生。後二所生。故爲四也。前七許同因位。故名能引所引。後五要因果相望。云能生所生。由此能所引中。但云此有彼有。後文則云此起彼起。起卽生也。故集論云。謂於因時有能引所引。於果時有能生所生。然文有染淨二觀。初於能引中明染觀。故云無明有故。行有。第二

約所引亦通能所相對。以明淨觀。故云識無故名色無。以識通能引有二種業。一持諸有情所有業縛。謂與行所引習氣俱生滅故。二與名色作緣。謂由識入母胎。名色得增長。今言識無者。卽不爲業熏。不持業縛。故不入胎增長名色。故云識無故名色無。第三能生所生相對。以明染觀。故云夢起。故苦起。苦卽當果。夢卽能生。能生有三。舉初攝末。下明淨觀。舉末攝初。蓋巧辨影畧耳。第四亦能所生相對。以明淨觀。謂因亡果喪耳。鈔第三下能生所生相對。上夢取有是能生。生老歟爲所生。

〔論〕初從十二緣說。無明有故。行有。識無故名。色無。愛起。故苦起。有滅。故生滅。此上四事。識之與愛。皆從無明妄計。諸有從生。今達有本無。卽十二緣滅。十二緣滅。非智有生。非智有滅。但除其病。其智無依。無形無爲。而靈通萬有。無思而現。無作而成。學之者。以止觀兩門。功終方會。此之一辨。後之十法。總終。聖教具陳。識相對治。異解已下。如文具明。

○第二有漏五蘊

何等爲世間法。所謂色受想行識。

〔疏〕蘊者。積聚義。雜集第一二云。藏果。重擔義。而標名。

世間者。世卽隱覆義。隱覆勝義故。又可破壞義。三世所遷故。間者。墮虛僞中故。隱覆之法。卽墮虛僞。故世卽是間。然色等蘊。通於無漏出世之義。欲阿毀故畧舉一分。鈔二有漏下文五。一釋總名。已見其藏果義。與蘊義大同。重擔與陰覆義大同。然彼論云。蘊義云何。答。諸所有色。乃至若近若遠。彼一切畧說。色蘊積聚義故。如財貨蘊。如是乃至識蘊。釋曰。此卽藏果義。蘊藏色等果法耳。言重擔者。論云。荷雜染擔。故名爲蘊。如肩荷擔。荷雜染擔者。謂煩惱等諸雜染法。皆依色等故。譬如世間身之一分。能荷於擔。卽此一分。名有蘊。色等亦爾。能荷雜染故名之爲蘊。而標名下。二釋世間。世有三義。隱覆名世。通爲無爲。如世界成就品。下二唯有爲世間。世卽是間。持業釋也。然色等下。三料揀。言通無漏者。謂佛五蘊。况因滅無常色。獲常色等兼通無爲。今但取有漏有爲蘊。不攝無爲義。不相應故。

留於無漏。云何知之。應知三種。一知其相。謂色以
在後段說。變礙為相。受以領納為義。想者取像。行謂遷流。識
者了別。二知其生滅。謂生無所從來。滅無所至。三
知其不生不滅。謂法本不生。今則無滅。故力林菩
薩云。分別此諸蘊。其性本空寂。空故不可滅。此是
無生義。况知一切法趣蘊。蘊卽法界無礙。方名真
實多聞。然諸蘊性。性皆遷流。隨勝立名。行之一種。
雖標總稱。卽受別名。又攝法多故。然諸蘊性下。第
五解妨。此卽以
通為別妨。釋有二義。初一可知。又攝法多者。第二
釋也。因此畧明五蘊攝法多少。且依大乘百法識
蘊唯攝八識心王。色蘊唯攝十一種色。想受二蘊。
但攝心所徧行中二數。四蘊但攝二十一法。除六

無爲蘊所不攝。餘七十二皆行蘊攝。故云多也。百法已見第一疏抄。

○第三無漏五蘊

何等爲出世間法。所謂戒定慧解脫解脫知見。

〔疏〕亦名無取五蘊。然無漏蘊亦有二類。一仍本名。

亦名色等。不與漏相應。故名爲無漏。二從已轉立。

名。卽五分法身。如今文是。欲顯戒等德是可欣。故。

從極果標以出世。理實亦有世間戒等。鈔理實亦有者。上五

蘊亦有出世間。然世間戒等。自有二義。一者外道。

共有十善等戒。四禪等定。世智之慧。脫下地惑於。

中知見二者。正教之中。亦說十善五戒。四禪入定。

無見慢修欣厭之慧。脫下界縛。了見分明。而是有。

漏。故名戒定慧三。上來頻釋解脫卽是離繫爲名。

解脫知見。由離繫縛。於境自在。觀求覺了。智論八
十八云。戒衆者。攝一切戒。和合成衆。衆卽蘊也。餘
皆準之。然卽轉前五蘊。成此五分。謂轉色蘊。成於
戒身。表無表戒。皆色蘊故。轉受蘊。而成定名。定名
正受。入四靜慮。出四受故。轉想成慧。凡所有想。皆
是虛妄。見相非相。見法身故。轉行爲解脫。無貪等
行。名心解脫。永斷無智慧解脫故。轉識成解脫。知
見。若與邪受妄想相應。謂識依根。了別諸境。若與
正受智慧相應。卽是現量。如實知故。仁王觀空品
云。觀色識受想行。得戒忍。知見忍。定忍。慧忍。解脫

忍卽斯義也。然此五分法身。不覆勝義。不爲相遷。不墮虛僞。故名出世。雜集云。謂能對治三界無顛倒。無戲論。無分別。故是出世間義。問。無取五蘊。卽有爲無漏。何以言不爲相遷。答。約教異故。前是權小所明。若實教定說。非爲無爲。同真性故。但似蘊相現。立以蘊名。故涅槃純陀云。善覆如來有爲之相。應言如來同於無爲。况二融攝。若如是知。名爲多聞。

○第四有爲

何等爲有爲法。所謂欲界。色界。無色界。衆生界。

有爲者。瑜伽一百云。有生滅。繫屬因緣。是名有爲。
智論云。有所得。故是名有爲。二論心境爲異。今畧
舉四事。三界卽所依處。衆生卽能依之者。然所依
處。隨心成異。故論云。欲所屬界。名欲界等。鈔論云。舍第八等字。等餘二界。云色所屬界。名爲色界。無色所屬界。名爲無色界。畧所屬二字。但名欲界等。

○第五無爲

何等爲無爲法。所謂虛空。涅槃。數緣滅。非數緣滅。緣起法。性住。

疏爲者。作也。卽前生滅。今虛空等。寂寞冲虛。湛然常住。無彼造作。故名無爲。瑜伽云。無生滅。不繫屬。

因緣。是名無爲。智論云。無所得故。名爲無爲。淨名
云。不墮數故。然諸論總名。大旨無別。言虛空者。離
諸障礙。無物所顯故。鈔唯識有六無爲。卽爲六段。初虛空釋語全是百法。疏意卽唯識依性假施設有義。彼論先釋法性云。謂空無我所顯真如。有無俱非。心言路絕。與一切法非一。非異等。是法真理。故名法性。離諸障礙。故名虛空。釋曰。彼論明法性空。但言離諸障礙。百法兼取外空云。無物所顯故。俱舍云。此中空無礙。一涅槃者。古有二釋。一云性寂滅故。此卽性淨涅槃。涅槃三十四。亦同此說。三數緣滅者。數謂慧數。由慧爲緣。揀擇諸惑。能顯滅理。故唐三藏譯爲擇滅。謂擇力所得滅。名爲擇滅。然此滅言。有其二義。一理性寂滅。此從所顯得名。

二因滅惑顯名理爲滅則從能顯得名。四非數緣滅者。非由慧數滅惑所得。但以性淨及於緣闕之所顯故。四非數緣滅者。故唯識云。不由擇力。本性清淨。及緣闕所顯。名非擇滅。釋曰。論存二義。初義異小。故上疏文。取爲楷定。言緣闕者。俱舍論云。畢竟碍當生。別得非擇滅。下釋中云。言當生者。當來生法。緣會則生。緣闕不生。於不生時。得非擇滅。此非擇滅碍當生法。令永不起。名畢竟碍。言別得者。謂非擇滅有實體性。緣闕位中。起別得。故非擇滅得。不因擇滅。但由緣闕。名非擇滅。五緣起者。有別有通。別謂十二因緣故。分別論者。大衆一說。雞胤化地。說出世部。皆立十二緣起。以爲無爲。彼意以其次第作緣。怕無雜亂。故說爲常。有佛無佛。此法自爾。名曰無爲。故智論三十二云。聲

聞法中亦說法性實際故。雜阿含中說有一比丘問佛。十二因緣爲是佛作。爲是餘人作。佛告比丘。我不作。十二因緣亦非餘人作。有佛無佛。諸法如法相。法位常有。所謂是事有故。是事有等。涅槃亦說。卽是無爲。遠公云。就人論法。三世流轉。是其有爲。廢人談法。法相常定。故曰無爲。望今經意。緣起無性。故曰無爲。大品云。菩薩觀十二因緣。如虛空不可盡。涅槃云。十二因緣卽是佛性。雖舉十二因緣。卽已攝陰界諸法。六法性住者。卽真如也。謂非妄倒。故名真如。又真實如常。揀妄揀事。於一切位。

恒如其性。而云住者。離遷變故。與法爲性。是隨緣
義。復云住者。是不變義。卽妄卽真。事皆如矣。若準
智論。法性。法住。各是一義。云云。卽爲七法。若準智
論下。別
釋取。上法字。及下住字。自爲
一義。成七無爲。則法字兩用。然小乘說三虛空。則
就外空。復計三皆實有。若大乘說。非唯數增。義亦
有異。唯識論中。二義建立。一唯心變故。二依法性
假施設有。謂此諸義。但一真如。隨義假設。一無相
義。二所證義。三惑盡義。四性淨義。五隨緣義。六隨
緣卽不變義。然小乘下。對棟權實。初舉
小乘。若大乘下。舉大斥小。此中法性
卽是真如。然法性真如。亦假施設。遮撥爲無。故說

爲有。遮執爲有。故說爲空。勿謂虛幻。故說爲實。理非妄倒。故名真如。爲法之性。名爲法性。非離色心。別有實體。今多聞之人。不唯知名而已。應如是知。

○第六有記法

何等爲有記法。謂四聖諦。四沙門果。四辯。四無所畏。四念處。四正勤。四神足。五根。五力。七覺分。八聖道分。
〔疏〕有記法者。有釋云。謂能招愛非愛果。故名有記。此乃通說。餘處辨記。卽是善惡。今唯舉善。應云。順理善法。可記錄故。下出所記法體。句有十一。義攝唯五。四聖諦。如前本品已辨。四沙門果。如梵行品。

四辯如第九地。三十七品。如第四地。四無所畏。今
 當畧明。謂外難無怯。故名無畏。瑜伽云。如來於此
 謗難。都不見有如實因相。由是因緣。能自了知。坦
 然無畏。無畏爲四。一一切智無畏。二漏盡無畏。三
 者障道。四出苦道。此四各有難答。初外難云。若佛
 是一切智者。有諸比丘。從他方來。何須問言。安樂
 住。不言一切智。無所不知。今問於他。一何相反。佛
 自唱言。我是一切智人。但爲攝受來者。隨順世間
 師弟人事故。鈔此之四段下。二辨相。初一切智無
 畏。難有二。初牒舉所難。二有諸比丘
 下。正難於中。先出難所因。謂諸部律中。多有此言。
 時諸比丘。至如來所。頭面禮足。佛便問言。比丘住

止安樂不。乞求易得。不以飲食為苦。耶等。今云
 何故問者。即是難也。言一切下結成難也。佛自唱
 言下答也。於中先按定所難。明不失一切智義。若
 具皆云。我於此難。正見無由得安隱住。無怖無畏。
 自稱。我是大仙尊位。但為攝受下。出是一切智之
 所以。示現問耳。非已不知。言攝授者。令發勝心。聞
 佛慰問。發道心故。隨順世間師弟人事者。此有二
 意。一者成上示現之相。二者亦令餘人審諦於事。
 佛知尚問。况餘不知。亦為後人作軌則。二有難云
 故。見來發心。應為引攝。故云隨順世間。二有難云
 若佛自言漏永盡者。何以愛語羅睺。呵罵調達。佛
 於此難。正見無由。安隱無怯。自唱德號。我實漏盡
 但為隨根而調伏故。二有難云下。第二無畏。先難
 中。文但有二。先牒舉所難。謂
 經中說言。我諸漏已盡。何以愛下正難。難之所因。
 合在其中。謂羅睺羅。被僧驅出。在於廁上。佛語諸
 比丘言。云何野干。驅師子。即愛語羅睺。調達。煩
 為惡行。佛時罵言。痴人。或云。食唾小兒等。耶佛於

此難下。亦先按定所難。不失漏盡之義。但爲隨根而調伏故。卽出愛恚所以。謂羅睺譬之慧象。隨逐人心。軟言卽調。調達喻之惡馬。楚毒方調。二有難。非是如來有愛羅睺。有恚調達漏未盡也。

云。若佛說欲能障道者。何故預流一來。尙有妻子之愛。佛於此難。心無怯懼。謂自唱德號。我說欲能障道。但障不還羅漢。非初二果。佛於此下答中亦欲爲障道。若具亦應云。我於此難。正見無由。安隱無怯。處大仙位。故云。自唱德號。我所說下。出不障所以。若說邪行。障諸聖道。若說畜妻。障離欲道。初二果人。性戒久成。故斷邪行。旣未離欲。不斷妻子。斯有何失。故諸四有難云。若佛說諸聖道能盡苦染法。非不障也。

者。何故羅漢受瘡潰。虵螫之苦。佛於此難。心無怯懼。自唱德號。我說聖道實能盡苦邊際。但說未來。

非現在故。我說聖道下。通前難。然有二意。一者由於前世故。業感身。於此身上得阿羅漢。苦依身在。故有此苦。非得羅漢。後有此苦。卽今疏意。更有意云。無學實無苦果。爲現惡因。必有苦報。由此聖者。示相受苦。起後教故。亦猶世尊受金鎗等。示義非實。故疏畧無。四。中。初。一。離所知障。次離煩惱障。三是出離道障。四卽出離之道。初。二。自利。後。二。利他。所以自歎此四者。初。一。爲菩薩。第。二。爲聲聞。後。二。通爲智論二十五。瑜伽五十。對法十四。廣辨其相。

○第七無記中分二。先徵名。後謂世間下。辨相。今初。

何等爲無記法

疏無記二義。一非善非惡。不能招感。愛非愛果。名爲無記。可釋餘文。今此正謂虛妄推度。非理問難。不可記錄。故名無記。非對善惡故。俱舍第十九云。諸契經說十四無記。卽其義也。亦名置記。記卽答也。不應答故。所以不答者。何謂此。乃無義語也。知之不免生歎。不知不障涅槃。前說有記。則反於此。智論第三云。所以不答十四難者。此事無實故。諸法有常。無此理故。言斷亦爾。如有人問。穀於牛角。得幾升乳。豈曰問耶。第十七云。有一比丘。思唯十四難不能解。辭佛不爲弟子。佛言。我爲老病死人。

說法濟度。此是鬪諍法。如中毒箭。不應推尋。楞伽亦云。皆是世論。非我所說。鈔第十七下。引昔例。今其文稍畧。具云。有一比丘。於十四難。思惟觀察。不能通達。心不能忍。持衣鉢。至佛所。白佛言。佛能為我解此十四難。使我了者。當作弟子。若不能解。我當更求餘道。佛言。痴人。汝共我要誓。若答十四難。汝作弟子。耶。比丘言。不也。佛言。汝痴人。今何以言。若不答我。不作弟子。我為老病。痴人。說法濟度。此十四難。是鬪諍法。於法無益。但是戲論。何用問為。若為汝答。汝心不了。至死不解。不能得脫。生老病。死。譬如有人。身被毒箭。親屬呼鑿。欲為出箭。塗藥。便言。未可出箭。我先當知。汝姓字。親里父母。年歲。次欲知箭出在何山。何木。何羽。作箭。鐵者。為是何人。是何等鐵。復欲知弓。何山。木。何蟲。角。復欲知藥。是何處生。是何種名。如是等事。盡了知之。然後聽汝出箭。塗藥。佛問。比丘。此人可得知此眾事。然後出箭。不比丘言。不可得。知。若待盡知。此則已。痴。佛言。汝亦如是。為邪見箭。凌毒所塗。已入汝心。欲拔此箭。作我弟子。為不欲。

拔箭。而欲求盡世間常無常邊無邊等。求之未得。卽失慧命。與畜生同歿。自投黑暗。比丘慚愧。深識佛語。卽得阿羅漢道。復次菩薩欲作一切智人。推求一切法。知其實相。十四難中。不滯不礙。知其是心重病。能出能忍。是名法忍。言十四者。卽此中前四四句。其第四四句。但合爲二。謂身與神一。身與神異。然諸經論。多說十四難。而相或同異。不繁會釋。今經委論。不出我法二執。

○二辨相中。文分五段。第一有四四句。就我明無記。第二過去下。就三世橫論。凡聖數之多少。三何等下。約凡聖豎論。初後四世間從何下。徵三世間所從。五何者下。約生歿際。以辨無記。今

初

謂世間有邊。世間無邊。世間亦有邊亦無邊。世間非有邊非無邊。世間有常。世間無常。世間亦有常亦無常。世間非有常非無常。如來滅後有。如來滅後無。如來滅後亦有亦無。如來滅後非有非無。我及衆生有。我及衆生無。我及衆生亦有亦無。我及衆生非有非無。

〔疏〕句雖十六。其過不出斷常。言世間者。準大品中。通三世間。謂衆生世間。五蘊世間。及器世間。今此文意。正顯衆生世間。兼明五蘊世間。以衆生是總。

主假者。外道計以爲我故。有邊等諸見。初有邊四句。約未來世。常等四句。約過去世。如來有無。依涅槃起故。中論邪見品云。我於過去世。爲有爲是無。世間常等見。皆依過去世。我於未來世。爲作爲無作。有邊等諸見。皆依未來世。涅槃品云。如來滅後。有無等。依涅槃起。我及衆生。有無四句。約現在說。旣知起見之本。次隨文別釋。卽爲四段。第一四句。言有邊者。卽斷見外道。計我於後世。更不復作。則與此身俱盡。無邊者。謂我於後世。更有所作。三俱句者。身盡故有邊。我不異故無邊。四俱非句者。亦

以我存身盡。見上有過。故立此句。謂身盡故非無邊。我存故非有邊。既皆邪見。故不答之。若欲破者。初之二句。墮無後世過。謂有邊。則與陰同盡。無邊則是今身。故皆無後世。無後世者。修道苦行爲何益耶。第三句亦有邊無邊者。若身盡我存。身我爲一爲異。一則不應有盡不盡。異則離蘊何相。知有我耶。若謂捨人生天。人分猶在。天分更增。則半天半人。故皆不可。第四句非有邊未免於無。非無邊未免於有。云何於此強分別耶。二常等四句。約過去者。過去世我。卽是今我。名之爲常。若常卽有大

過。破壞因果涅槃等故。若謂我今始生名爲無常。若爾。我是作法亦墮無因。無因則亦無涅槃等。第二見上二過。便謂我常身無常。離身何處有我。又成上二過。第四謂我不異故非無常。身有異故非常。破同第三句。又中論云。一切法空故。何有邊無邊。及常等見。餘義廣如彼論。三如來滅後四句。依中論。附涅槃起四句。如來卽佛也。順此經文。亦是外道自立已師而爲如來。有謂如來滅後定有不變。或謂入無餘依。同於太虛。或謂法有應無。或謂約應非有。約法非無。以其四句皆成戲論。不見如

來寂滅相故。亦爲邪見。此則權小之徒。未能免也。
瑜伽八十七云。依二道理。如實隨觀。俱不可記。如
來滅後。若有若無。所以者何。且依勝義。彼不可得。
况其滅後。或有或無。若依世俗。爲於諸行。假立如
來。爲於涅槃。若於諸行。如來滅後。無有一行流轉
可得。爾時何處假立如來。旣無如來。何有無等。若
於涅槃。涅槃唯是無行所顯。絕諸戲論。自內所證
絕戲論故。施設爲有。不應道理。亦復不應施設。非
有。勿當損毀。施設妙有。寂靜涅槃。又此涅槃極難
知故。最微細故。說名甚深。種種非一。諸行煩惱斷

所顯故。說名廣大。現量比量及正教量所不量故。說名無量。四我及衆生有無等四句。此竝雙立。衆生卽是五蘊。非約總主。有卽定有。定有著常。無卽定無。定無著斷。三遠上二過。雙立有無。卽墮相違。四避此相違。立俱非句。又成戲論。

○第二門明三乘凡聖數之多少

過去有幾如來般涅槃。幾聲聞辟支佛般涅槃。未來有幾如來。幾聲聞辟支佛。幾衆生。現在有幾佛住。幾聲聞辟支佛住。幾衆生住。

〔疏〕凡聖數之多少者。以橫無邊故。不可記也。

○第三門豎無際故不可記也

何等如來最先出。何等聲聞辟支佛最先出。何等衆生最先出。何等如來最後出。何等聲聞辟支佛最後出。何等衆生最後出。何法最在初。何法最在後。

〔疏〕有人答問云有初佛言自然悟引懶祭天亦爲應機寧加置記若有初佛如來應知則可說名言

何法者染淨等一切法也。

鈔第三門豎明中言有人答問者卽水南善知

識答燕國公張說問云法在前佛在前答云法在前諸佛所師所謂法故便被難云若爾最初成佛前無佛說何由悟法答云自然而悟如月令中懶乃祭天豈有人教燕公大伏亦爲應機者歎其善對寧加置記者爲順經文從若有初佛下出不加置記所以既有初佛悉數難窮如來具足一切種

智直舉初佛。則可示矣。故雖善對。末息難源。言何法者。染淨一切法者。卽如眞妄前後之難也。初會畧明。初地當廣。

○第四門徵世間所從

世間從何處來。去至何所。有幾世界成。有幾世界壞。世界從何處來。去至何所。

疏有六句。初二句問衆生。及蘊世間。次四句約器世間。以外道計衆生有最初生故。或謂從冥諦中來。還至冥故。或謂世界皆微塵成。謂至妙之色。常恒不變。聚則爲身器。散則成微塵故。此皆邪見之源。故不應答。

○第五約生歿初後際

何者爲生死最初際。何者爲生死最後際。

〔疏〕生歿初後際。唯有二句問。初際無始。聖教所明。生歿有終。豈非正理。答。畧有三義。一約一人。則可云終。通望一切。則無終極。二以彼定執。長邪見。故亦不應答。謂若許有終。必有始。故常法無始。亦無終。故三約法性。皆不可說。故中論云。大聖之所說。本際不可得。生歿無有始。亦復無有終。若無有始終。中當云何有。是故於此中。先後共亦無。旣言本際不可得。亦不應定謂無始無終。况有始終之見。

耶又有偈云。眞法及說者。聽者難得故。是故則生
處。非有邊無邊。上諸邪見。多是外道。亦參小乘。菩
薩善知。則問答無滯。便舉破者。令自他造中故也。
鈔上諸邪見下。總結上意。言菩薩善知問答者。具
四種答。一正是置答。二如說生處無有始終。是一
向答。三如云衆生器界五種不同。是分別答。四若
有問云。世尊。約何法說我。何法說衆生。應答言。約
假名說我。約因緣說衆生。是名隨問答。若通
前七以辨多聞。問答居然可知。餘可思準。

是名無記法

〔疏〕結名可知。

○大科第二顯多聞之意

菩薩摩訶薩作如是念。一切衆生於生死中無有多

聞。不能了知此一切法。我當發意持多聞藏。證阿耨
多羅三藐三菩提。爲諸衆生說真實法。是名菩薩摩
訶薩第五多聞藏。

〔疏〕謂悲物無聞長淪生處。故誓持聞藏。自證利他。

福城弟子薛代聖法名與袁刻
華嚴經十無盡藏品疏論纂要第四十
二卷流通伏願植一乘之堅種資人天
之勝福箕裘綿遠門闕昌熾者
康熙二十二年九月 日華藏室謹題

大方廣佛華嚴經疏論纂要卷第四十二